




Cijenjene kolegice i kolege,

Centralna banka Bosne i Hercegovine ove godine bilježi svojevrsan jubilej - deset godina rada. Neki od uposlenih sjetit će se početaka djelovanja ove institucije, veći broj je u Centralnu banku Bosne i Hercegovine stigao u godinama nakon osnivanja, ali su svi, bez izuzetka, bili aktivni sudionici njenog razvoja.

Historijska važnost osnivanja Centralne banke Bosne i Hercegovine u složenim ekonomskim, socijalnim i političkim uslovima u kojima je nastajala, ogleda se u tome da je njenim osnivanjem obilježen početak procesa monetarnog ujedinjenja zemlje kao preduslova za njenu ekonomsku reintegraciju.

U godinama nakon osnivanja, Centralna banka Bosne i Hercegovine suočila se sa velikim izazovima: puštanje u opticaj domaće valute, reforma platnog prometa, reforma bankarskog sektora, povlačenje njemačke marke za koju je domaća valuta bila vezana i uvođenje eura kao sidro valute, puštanje u opticaj novih bosanskohercegovačkih novčanica i kovanica, pomoć državi u dobijanju prvog suverenog kreditnog rejtinga...sve to uz izuzetne poslovne rezultate koje je Centralna banka Bosne i Hercegovine iz godine u godinu ostvarivala.

Naravno, profesionalno osoblje, uspješan menadžment, strateški ciljevi Upravnog vijeća i podrška šire javnosti preduslovi su ovakvog uspjeha.

Centralna banka Bosne i Hercegovine je 1997. godine počela raditi sa 46

uposlenih. Danas ima više od 300 uposlenih, a spoj iskustva i novih ideja okosnica je rada ove institucije. Educiran i motiviran kadar, predan poslu i lojalan instituciji, Upravno vijeće, Uprava i svaki službenik, odnosno ljudski potencijal predstavljaju ključne faktore uspjeha Centralne banke Bosne i Hercegovine.

Iako imamo razloga za zadovoljstvo, ne smijemo zaboraviti da do sada urađeno zahtijeva da budemo još ustrajni i da ova monetarna institucija, kao dio ekonomskog sistema Bosne i Hercegovine, bude stub stabilnosti i povjerenja. Evropski put Bosne i Hercegovine je i put Centralne banke Bosne i Hercegovine.

Imati viziju, strategiju i cilj jeste važno, ali imati motivirano osoblje za postizanje cilja još je važnije. Stoga želim zahvaliti svim uposlenim na izuzetnom zalaganju u razvoju Centralne banke Bosne i Hercegovine. Uvjerem sam da će svi uposleni s istim žarom raditi i u budućnosti za dobrobit ove institucije i svih građana.

Uz želje za dobro zdravlje i ličnu sreću, u ime Upravnog vijeća, Uprave i u svoje ime čestitam vam 10. godišnjicu Centralne banke Bosne i Hercegovine.

Kemal Kozarić
Guverner

CBBiH obilježava deset godina djelovanja

Centralna banka Bosne i Hercegovine 11. augusta/kolovoza 2007. godine obilježila deset godina djelovanja. CBBiH je počela raditi 11. augusta/kolovoza 1997. godine, od kada je, djelujući u složenim prilikama, dala značajan doprinos uspostavi monetarne stabilnosti u zemlji. Već neko vrijeme traju pripreme za obilježavanje desete godišnjice, koje će biti organizovano 13. i 14. septembra/rujna. U okviru obilježavanja, planirano je održavanje konferencije međunarodnog karaktera na koju su, uz domaće predstavnike državne vlasti, pozvani i guverneri centralnih banaka regiona čija će izlaganja biti posvećena budućoj saradnji centralnih banaka, potom predstavnici Banke Švedske, Evropske centralne banke (ECB) i Međunarodnog monetarnog fonda (IMF). Na proteklih deset godina CBBiH osvrnuće se i prvi guverner CBBiH

Serge Robert koji će govoriti o uspostavljanju ove institucije, potom guverner sa najdužim stažom **Peter Nicholl** čije će izlaganje biti posvećeno razvoju CBBiH tokom njegovog mandata, dok će o trenutnoj situaciji i budućnosti CBBiH govoriti aktuelni guverner **Kemal Kozarić**. Učesnike konferencije, kako je planirano, pozdraviće predsjedavajući Vijeća ministara BiH **Nikola Špirić**. Izlaganjem državnog ministra finansija i trezora o ekonomskoj situaciji u BiH biće završena konferencija. U večernjim satima u Narodnom pozorištu u Sarajevu biće organizovan zvanični prijem tokom kojeg će se, osim guvernera Kozarića, gostima obratiti i predsjedavajući Predsjedništva BiH **Željko Komšić**. Drugog dana obilježavanja, za goste će biti organizovan izlet u Mostar i Međugorje.

Jubilarna kovanica

U povodu desete godišnjice djelovanja, CBBiH će izdati jubilarnu kovanicu – srebrenjak, koja je ujedno i simbol jednog perioda u kojem je CBBiH imala značajnu ulogu i mjesto u istoriji i razvoju Bosne i Hercegovine. Kovanica je proizvedena sa sljedećim specifikacijama:



Prečnik (mm)	38.61
Težina (g)	28.28
Legura	925Ag
Oblik	okrugao
Ivica	nazupčena
Limit izdavanja	2000 komada

Monografija

CBBiH planira objaviti i Monografiju u povodu deset godina rada, a tekstove će pisati ljudi koji su značajno doprinijeli uspostavi i razvoju CBBiH: bivši guverneri **Serge Robert** i **Peter Nicholl**, aktuelni guverner **Kemal Kozarić**, član prvog saziva Upravnog vijeća CBBiH **Kasim Omićević**, viceguverneri **Anka Musa**, **Feriha Imamović** i **Ljubiša Vladušić**, glavni interni revizor **Ankica Kolobarić**, a u Monografiji će se naći i tekst **Simeuna Vilendečića** o bankarskom sektoru u BiH.




Potcijenjene veličine BDP-a

Piše: Amir Hadžiomerađić, rukovodilac Odjeljenja za ekonomska istraživanja, statistiku i publikacije

Mjerenje ukupnih ekonomskih aktivnosti jedan je od najvažnijih ciljeva statistike nacionalnih računa, pa je stoga bruto domaći proizvod (BDP) najčešće korišteni pokazatelj veličine svake ekonomije. Veličine BDP-a su bile u ranijim godinama značajno potcijenjene, što je onemogućavalo ekonomsku analizu i stvaralo iskrivljenu sliku o stvarnoj veličini ekonomskih aktivnosti. U julu/srpnju Agencija za statistiku BiH objavila je najnovije podatke o BDP-u (po proizvodnom metodu) koji, prema savremenoj statističkoj praksi, uključuje revizije i za prethodne periode. Iz tih podataka (prikazani na grafikonu) vidljivo je kako su se tokom vremena mijenjale procjenjene vrijednosti BDP-a, pa je tako vrijednost BDP-a za 2003. godinu povećana za skoro 18%, a BDP-a za 2004. godinu za 17% u odnosu na prvobitno

objavljene vrijednosti. Vrijednost BDP-a za 2005. godinu nije pretrpjela tako veliku promjenu, s obzirom na to da je pravljen sa poboljšanom metodologijom iz 2006. godine. Posljednje procjene BDP-a uključuju i procjenu neobuhvaćenih ekonomskih aktivnosti, koje su napravljene uz pomoć međunarodnih eksperata. Raspoloživi podaci ukazuju da je vrijednost BDP-a za 2003. i 2004. godinu povećana za oko 8% po osnovu uključivanja neosmatrane ekonomije. Ova procjena neosmatrane ekonomije je dobrodošla i podiže kvalitet bh. statističkih podataka, ali je po svemu sudeći i dalje prilično konzervativna. Neka ranija statistička istraživanja ukazivala su na to da "siva ekonomija" u zemljama tranzicije u prosjeku iznosi 21%, pri čemu su uzete u obzir i mnogo uređenije zemlje nego što je BiH. Isto tako, visina BDP-a (objavljeno u junu/lipnju 2007. godine) prema potrošnom metodu veća je u odnosu na rezultate prema proizvodnom metodu, što sugerira da je i ovaj posljednji BDP do izvjesne mjere potcijenjen.

BDP u BiH za period 2003-2006



Izvor: Bilteni o nacionalnim računima BHAS

Stopa rasta realnog BDP-a (prema proizvodnom metodu) u BiH je u 2006. iznosila 6,2% (što je identično ranijoj procjeni CBBiH) i po toj stopi BiH se nalazi među dinamičnijim tranzicijskim ekonomijama u Evropi. Rast je

najvećim dijelom generisan kroz naglašeno uvećanje bruto dodatne vrijednosti u prerađivačkoj industriji (11,3%), turizmu – hoteli i restorani (14,7%) i uslužnim djelatnostima (12%).

FINANSIJSKI IZVJEŠTAJI ZA ŠEST MJESECI 2007. GODINE

Rekordni pokazatelji u bilansu stanja i finansijskim efektima poslovanja

Za prvih šest mjeseci 2007. godine, Centralna banka Bosne i Hercegovine zabilježila je rekordne pokazatelje u bilansu stanja i finansijskim efektima poslovanja. Prema Finansijskim izvještajima CBBiH za prvih pola godine, ostvaren je rekordan iznos deviznih rezervi od 5,9 milijardi KM. U julu/srpnju devizne rezerve su premašile iznos od šest milijardi KM. Rekord je dostignut i u iznosu kapitala i rezervi od 358 miliona KM, te u višku

deviznih rezervi u odnosu na monetarnu pasivu CBBiH. Višak je iznosio oko 305 miliona KM. Finansijski efekat poslovanja CBBiH je, također, rekordan – ostvarena je neto dobit od 60,8 miliona KM. U poređenju za prvih šest mjeseci prošle godine kada je ostvarena neto dobit iznosila 29,7 miliona KM, ovogodišnja neto dobit je dva puta veća. Očekuje se da će neto dobit CBBiH za cijelu 2007. godinu iznositi oko 120 miliona KM.

Rad Investicionog komiteta u prvom polugodištu 2007. godine

Piše: Vasilija Arapović, rukovodilac Odjeljenja za monitoring i analize

Odlukom o sastavu, djelokrugu i načinu rada utvrđen je sastav i uređen način rada Investicionog komiteta Centralne banke Bosne i Hercegovine i odnosi sa organizacionim dijelovima CBBiH, u cilju držanja i upravljanja deviznim rezervama CBBiH na siguran i profitabilan način i uspostavljanja ograničenja rizika. Prema navedenoj odluci, Investicioni komitet je na 5. sjednici u 2007. godini donio Poslovnik o radu Investicionog komiteta CBBiH. Devizne rezerve CBBiH su investirane u skladu sa Smjernicama CBBiH o investiranju deviznih rezervi i u skladu sa instrukcijama Investicionog komiteta. Upravljanjem deviznih rezervi u ovom periodu, u potpunosti su ispoštovani okviri prema Smjernicama o investiranju deviznih rezervi. Kako je najveći dio prihoda CBBiH rezultat načina na koji se investiraju devizne rezerve, Investicioni komitet je činio napore da se u okviru Smjernica o investiranju deviznih rezervi CBBiH, pri značajnim promjenama kamatnih stopa na tržištu novca u ovom periodu, postigne maksimalan prihod, vodeći računa o sigurnosti ulaganja sredstava kao i dnevnoj likvidnosti. Kamatne stope po kojima je CBBiH investirala svoje devizne rezerve, prvenstveno misleći na depozite, zavisile su od kretanja kamatnih stopa na tržištu novca. Referentna kamatna stopa Evropske centralne banke (ECB) se do juna/lipnja 2007. godine povećavala dva puta po 25 baznih poena. Od decembra/prosinca 2006. godine bila je 3,50% da bi u martu/ožujku uslijedilo povećanje i iznosila je 3,75%, a potom u junu/lipnju dalje povećanje, te je referentna kamatna stopa dostigla nivo od 4,0%. Proces povećanja kamatnih stopa, u cilju osiguranja stabilnosti cijena i usporavanja inflacije, ECB zasniva na činjenici da je ekonomija u zoni eura na solidnom razvoju za razliku od američkog tržišta, tako da se prognozira do kraja 2007. godine sigurno još jedno povećanje za 25 baznih poena. Predviđanja analitičara ukazuju na moguće povećanje i do nivoa 4,50%. Uticaj promjenljivosti kamatnih stopa ECB na portfolio deviznih rezervi CBBiH na osnovu razmatranih analiza ročne strukture investiranja i dospjeća investiranih depozita je rezultirao da se strategija investiranja izmijeni u smislu povećanja učešća investiranja od 31 do 180 dana. Dati scenario simulacije se pokazao kao optimalni plan u tromjesečnoj dinamici povećanja kamatnih stopa ECB. Portfolio CBBiH investiran u depozite je raspoređen u 16 ino korespodentskih banaka. Rast deviznih rezervi kao i pokrivanje rizika koncentracije depozita u jednoj ino banci prema neto slobodnim deviznim rezervama CBBiH, otežava odnosno sve više sužava prostor investiranja shodno Smjernici br. 3 i Smjernici br. 4. Investicioni komitet je u razmatranju ove situacije ukinuo internu instrukciju da po skalama rejtinga banaka od AA- do AAA ograničava investiranje terminski (ranije definisano da se kod banke sa rejtingom AA-može investirati najviše do šest mjeseci) unutar 365 dana. Ova instrukcija je bila u primjeni zbog opreza pada rejtinga ino korespodentskih banaka

CBBiH. Istovremeno je razmatran i prihvaćen prijedlog da se Upravnom vijeću predloži dopuna Smjernice br 3. u kojoj bi se dozvolilo da standardna podobna ugovorna strana za kratkoročno investiranje u depozite do mjesec dana ima rejting A. Usvajanjem ovog okvira za korespodentsku ino banku sa rejtingom A, CBBiH bi imala smanjenje koncentracije sredstava po jednoj banci, finansijski rizik bi bio minimiziran, a ostvarila bi se i disperzija geografskog rizika. Centralne banke u okruženju već godinama investiraju svoje devizne rezerve kod ino banka sa rejtingom A. U cilju dalje disperzije geografskog rizika na sjednicama Investicionog komiteta data je i lista novih potencijalnih ino banaka koje zadovoljavaju minimum rejtinga predviđenog smjernicama. Investicioni komitet je, razmatrajući dalje korake investiranja u repo transakcije, usvojio Operativna pravila za ulaganje deviznih rezervi CBBiH u reverse repo transakcije. Ova pravila poslužiće kao osnova šta bi ugovori o repo transakcijama sa ino bankama trebali sadržavati. Mjesečni izvještaji o investiranju deviznih rezervi sadrže prikaz kretanja stanja ukupnih deviznih rezervi, prosječnu ponderisanu kamatnu stopu ostvarenu na ukupni portfolio i ostvarenu kamatnu stopu na mjesečno investiranje. Istovremeno je u izvještaju obuhvaćeno i kretanje efektivne u trezoru, na putu i u izdvojenim trezorima CBBiH, kao i prebacivanje gotovine iz centralnog trezora na račun ino banke. Prinos po ostvarenom investiranju je bio rezultat rasta kamatnih stopa po kojima CBBiH investira depozite. Ostvarena prosječna kamatna stopa kretala se od 3,54% u januaru/siječnju do 3,95% u junu/lipnju, tako da prosječna kamatna stopa u prvih šest mjeseci iznosi 3,74%. Benchmark za depozite koji je mjerilo ka cilju u uspješnosti investiranja CBBiH je ostvaren, odnosno zanemarljivo je niži za 0,07% na kraju prvog tromjesečja i 0,06% na kraju drugog tromjesečja 2007. godine u odnosu na ostvareno investiranje CBBiH. Analizom mjesečnih performansi putem eksternih menadžera koji upravljaju dijelom portfolija CBBiH u vrijednosne papire, Investicioni komitet je sagledavao pojedinačno ostvarene rezultate dva asset menadžera. Oba eksterna menadžera su se u potpunosti pridržavali investiranja prema definisanim Operativnim pravilima upravljanja investicionim portfolioom za eksternog menadžera CBBiH. Protekli period karakteriše pažljivo praćenje i redovno održavanje kontakata sa oba eksterna menadžera oko ispravnosti strategije, odnosno odabranih operativnih pravila CBBiH za portfolio i očekivanja na tržištu. U prvih šest mjeseci 2007. godine održano je pet redovnih sjednica Investicionog komiteta. Nadgledanje investiranja deviznih rezervi i pridržavanje utvrđenih smjernica o investiranju vrši se na više nivoa, tako da se informisanost o investiranju deviznih rezervi CBBiH ostvaruje dnevno, petnedodnevno, mjesečno i s analizama za protekla tri mjeseca u tekućoj godini. Korisnici navedenih izvještaja i informacija su Upravno vijeće CBBiH, Uprava CBBiH, Ured glavnog internog revizora, predsjedavajući i članovi Investicionog komiteta kao i Služba za monetarnu statistiku i rezidentni ured Međunarodnog monetarnog fonda u Sarajevu.



GBRS BANJA LUKA

Agencija za bankarstvo Republike Srpske (RS) dala je dozvolu AIEFK banci a.d. Banja Luka za obavljanje međubankarskih platnih transakcija u unutrašnjem platnom prometu. Služba za trezorske poslove je u julu/srpnju obavila 211 transakcija. Ulaznih transakcija bilo je 138, a izlaznih 73. Ukupna količina primljene KM efektive iznosila je 1.145.327 komada novčanica i 542.000 komada kovanica. Komercijalnim bankama isplaćeno je 1.544.829 komada novčanica i 1.017.000 komada kovanica. Što se tiče EUR efektive, primljeno je 261.771 komad novčanica, a komercijalnim bankama isplaćeno je 218.900 komada novčanica. Od 1. do 31. jula/srpnja **Sonja Jaćimović**, student treće godine Univerziteta "Braća Karić" iz Beograda, smjer bankarstvo i **Verica Krčmar**, student treće godine Ekonomskog fakulteta u Banjoj Luci, obavljale su ferijalnu praksu.

GJ SARAJEVO

U toku jula/srpnja, u Službi za bankarstvo obavljeno je 70 transakcija prodaje KM u vrijednosti od 191.404.527,47 KM i 11 transakcija kupovine KM u vrijednosti od 91.042.404,63 KM. Saldo kupoprodaje KM u toku ovog mjeseca je pozitivan i iznosi 100.362.122,84. Ukupni saldo kupoprodaje KM u GJ Sarajevo od početka rada 1997. godine je pozitivan i iznosi 5.183.546.099,78 KM. U Službi za trezorske poslove u toku jula/srpnja izvršene su 234 transakcije gotovog novca, i to 137 ulaza u vrijednosti od 42.551.905 KM, odnosno 1.275.752 komada novčanica i 1.658.280 komada kovanica. Bilo je 97 izlaza u vrijednosti od 90.220.979,70 KM, odnosno 2.261.621 komad novčanica i 1.872.136 komada kovanica. Služba za monitoring i platni promet izdala je 361 izvještaj iz Jedinственог регистра računa za što je naplaćeno 1.805 KM. Od 1. augusta/kolovoza 2007. godine LT Gospodarska banka Sarajevo se pripaja UPI banci Sarajevo, koja će poslovati pod nazivom UPI banka d.d. Sarajevo.

GJ MOSTAR

U Službi za trezorske poslove tokom mjeseca broj ulaznih protokola iznosio je 75 komada ukupne vrijednosti 68.317.610,00 KM, a broj izlaznih protokola 68 komada ukupne vrijednosti 56.221.350,00 KM. U istom razdoblju Služba za monitoring i platni promet primila je 61 zahtjev za izdavanje podataka iz Jedinственог регистра transakcijskih računa i izdala potvrde. Obavljeno je ukupno 299.019 transakcija platnog prometa od čega 290.913 transakcija žirokliringa i 8.106 transakcija RTGS-a. Ferijalnu praksu u GJ Mostar počeo je obavljati **Dragan Gabrić**, student četvrtе godine Ekonomskog fakulteta u Mostaru.

FILIJALA BRČKO

Ured glavnog internog revizora izvršio je reviziju poslovanja Filijale CBBiH Brčko za prvo polugodište 2007. godine. Ferijalnu praksu obavljala je **Emina Čačković**, student četvrtе godine Ekonomskog fakulteta u Brčkom. Izvršena je primopredaja izvedenih radova na rekonstrukciji i dogradnji objekta Filijale CBBiH u Brčkom od komisije koju su imenovali guverner CBBiH, izvođač radova i nadzorni organ, uz prisustvo projektanta. U toku je tehnički prijem objekta od Komisije koju je imenovala Vlada Brčko Distrikta BiH. U toku jula/srpnja, u odnosu na juni/lipanj 2007. godine u izdvojenom trezoru indeks vrijednosti ulaza KM bio je 100,90, indeks vrijednosti izlaza KM bio je 116,35 i indeks vrijednosti ulaza eura bio je 179,84.

FILIJALA PALE

U Filijali Glavne banke Republike Srpske na Palama u julu/srpnju je realizovano 29 transakcija kupoprodaje KM. Od toga na prodaju KM otpada 25 transakcija u iznosu od 21,2 miliona KM, a na kupovinu KM četiri transakcije u iznosu od 15,9 miliona KM. U odnosu na isti period prethodnog mjeseca broj transakcija kupovine i prodaje KM porastao je za 4%. Broj kupovina KM opao je za 43 indeksna poena, a broj transakcija prodaje KM porastao je za 19%. Međutim, saldo između kupovine i prodaje KM porastao je 19,8 miliona KM ili za 6%. Broj pologa KM porastao je za 3%, a broj isplata KM porastao je za 24%. Broj primljenih zahtjeva u CAS porastao je za 2%, a broj međubankarskih transfera opao je za 18 indeksnih poena u odnosu na prethodni period. Depoziti komercijalnih banaka u KM porasli su za 3%, a depoziti u drugim valutama povećani su za 129%. Prosječan saldo na računima rezervi komercijalnih banaka porastao je za 30% i sve banke su ispunile obaveznu rezervu.

Devizne rezerve prešle šest milijardi KM

Centralna banka Bosne i Hercegovine (CBBiH) obavještava javnost da su devizne rezerve dostigle nivo od 6,04 milijardi KM (3,09 milijardi eura, odnosno 4,25 milijardi US dolara), što je najveći iznos deviznih rezervi do sada. Trend rasta deviznih rezervi je nastavljen, te su od početka godine devizne rezerve povećane za oko 700 miliona KM. Razlozi koji su doveli do povećanja deviznih rezervi su veći priliv turista u Bosnu i Hercegovinu, sezonski uticaj posjeta bh. građana koji žive u inostranstvu, te priliv dijela sredstava iz privatizacije velikih sistema u Bosni i Hercegovini. Devizne rezerve sastoje se najvećim dijelom iz sredstava nastalih kupovinom i prodajom KM i sredstava obavezne rezerve koju komercijalne banke drže u CBBiH.



EDUKACIJA

Seminari u Banci Engleske i Evropskoj centralnoj banci



Verica Božić



Jasmina Halilbegović

U julu/srpnju 2007. godine održana su dva seminara. Rukovodilac Odjeljenja za servisiranje javnog duga BiH **Verica Božić** prisustvovala je seminaru "Centralna banka i emisija državnih vrijednosnih papira" koji održan u Londonu od 9. do 13. jula/srpnja u organizaciji Centra za studije centralnog bankarstva pri Banci Engleske. Seminaru o formulaciji i implementaciji monetarne politike u zoni eura, koji je organizovala Evropska centralna banka, prisustvovala je rukovodilac Odjeljenja za međunarodnu saradnju i evropske integracije **Jasmina Halilbegović**.

TREĆI SPORTSKI SUSRETI CENTRALNIH BANAKA REGIONA

Atina domaćin bankarima

Banka Grčke ovogodišnji je organizator Sportskih susreta centralnih banaka regiona na kojima učestvuju i Centralna banka Bosne i Hercegovine. Sportski susreti će biti održani od 29. augusta/kolovoza do 2. septembra/rujna u Atini, a učešće je do sada prijavilo deset centralnih banaka: Banka Albanije, Centralna banka Bosne i Hercegovine, Narodna banka



Bugarske, Centralni bankarski autoritet Kosova, Narodna banka Makedonije, Centralna banka Crne Gore, Narodna banka Makedonije, Narodna banka Srbije, Centralna banka Turske i Banka Grčke. Banke će se takmičiti u nogometu, košarci, odbojci, šahu, stonom tenisu i tenisu. Takmičenja će biti održana u ljetnom kampu Banke Grčke, nedaleko od Atine. Ekipu CBBiH će predstavljati oko 35 takmičara. Organizacija ovakvih susreta počela je prije dvije godine, te su prve Sportske igre centralnih banaka regiona održane u Beogradu u organizaciji Narodne banke Srbije. Organizator prošlogodišnjih susreta bila je CBBiH, a održani su u Sarajevu.



IN MEMORIAM

Marijana Kovačević

Dana 18. jula/srpnja 2007. godine tragično je, u 32. godini, preminula naša Marijana Kovačević. Rođena je 18. decembra/prosinca 1975. godine u Sarajevu, gdje je završila Srednju tehničku školu. U Centralnoj banci Bosne i Hercegovine je počela raditi 21. augusta/kolovoza 1997. godine, a bila je raspoređena na radnom mjestu administrativnog pomoćnika u Uredu viceguvernera CUCBBiH. Svi koji su poznavali Maju znali su je kao iskrenu prijateljicu, vrijednu i pouzdanu radnu kolegicu. Njenim odlaskom zauvijek je nestala vedrina i energija koju je prenosila na sve nas. Nismo ni znali koliko smo je voljeli. Našu Maju nećemo nikada zaboraviti.

ZAPOŠLJAVANJE

Novi službenici u Sarajevu i Brčkom

Ujulu/srpnju 2007. godine u radni odnos na neodređeno vrijeme primljeni su **Nihad Bektešević** na radno mjesto višeg stručnog saradnika za devizne operacije u Službi "Front office" i **Aleksandar Tomić** na radno mjesto višeg stručnog saradnika za statistiku realnog sektora i vanjskog duga u Službi za statistiku vladinih finansija, vanjskog duga i realnog sektora.



N. Bektešević



A. Tomić



S. Hadžiahmetović

U Filijalu CBBiH Brčko u radni odnos na neodređeno vrijeme primljeni su **Vedad Mulaomerović** na radno mjesto saradnika za sigurnost u Službi za sigurnost, te **Elvis Baković**, **Sejad Bećirović**, **Nedžad Mehaković**, **Admir Ramadani** i **Damir Vraštanović** na radna mjesta samostalnih referenata za

fizičku sigurnost u Službi za sigurnost. Svi službenici počeli su raditi 1. jula/srpnja 2007. godine. U radni odnos na neodređeno vrijeme 11. jula/srpnja primljena je **Sadžida Hadžiahmetović – Sarajlić** na radno mjesto višeg stručnog saradnika za monitoring u Službi za monitoring i platni promet CBBiH – GJ Sarajevo. Novoupisani su primljeni po oglasu od 2. aprila/travnja 2007. godine.



Izdavač: Centralna banka BiH; **Adresa:** Maršala Tita 25, 71000 Sarajevo; **Priprema:** Služba za odnose s javnošću CBBiH;

Web stranica: <http://www.cbbh.ba>; **E-mail:** contact@cbbh.ba; **Kontakt telefon:** (033) 278-123; **Urednik:** Zijada Kovač,

DTP urednik: Almir Salihović;

Saradnici: Ema Mundžehasić (lektor), Almir Salihović, Danijela Golijanin, Daria Dragaš, Vildana Popovčević (lektor - engleska verzija), Ernadina Bajrović, Anda Bijeljac i Adela Lincender (tekstovi o zapošljavanju i edukaciji); **Štampa:** Sevda Handžić, Služba za zajedničke poslove CBBiH; Bilten izlazi svakog mjeseca



Mjesečni bilans stanja se izdaje da bi se obezbijedile informacije o radu Centralne banke Bosne i Hercegovine prema pravilu currency boarda i da bi se ponudile posebne informacije koje zahtijeva Zakon o Centralnoj banci Bosne i Hercegovine.

Neke posebne karakteristike bilansa stanja od 30. juna/lipnja su:

Na dan 30. juna/lipnja Banka je zadovoljila obaveze pravila currency boarda kako to navodi član 31. Zakona. Stanje neto strane aktive prevazilazi njenu monetarnu pasivu u konvertibilnim markama (KM) za 304.697 hiljada KM. Ovo je prikazano u stavki neto devizna aktiva minus monetarna pasiva.

Devizna aktiva je sačinjena uglavnom od depozita koji se drže kod ino-banaka.

Bilans stanja, također, prikazuje kompoziciju držanja valuta tako što ih diferencira u EUR i ostale valute.

Bančine devizne investicije donose prihod za banku.

Monetarna pasiva je u najvećem obimu predstavljala obavezu Banke za KM novac u opticaju (2.207.565 hiljada KM) i depozite rezidentnih banaka (3.269.123 hiljade KM).

Kapital i rezerve odražavaju početni kapital, rezerve, dionice i akumulirane dobiti Banke od početka njenog rada 11. augusta/koloviza 1997. godine

Kao depozitar za članstvo Bosne i Hercegovine u MMF-u, Banka iskazuje u bilansu stanja MMF-ove račune 1 i 2 kao stranu pasivu, i čuva vrijednosne papire Vlade Bosne i Hercegovine vezane za članstvo. Istovremeno djelujući i kao fiskalni agent u ime Vlade u njenim odnosima sa MMF-om, Banka evidentira sredstva i obaveze Vlade vezane za članstvo na povjerilačkim računima odvojenim od bilansa stanja.

Konsolidacijom svih računa vezanim za članstvo Bosne i Hercegovine u MMF-u izračunava se obaveza kao neto članska pozicija od 10.073 hiljade KM.

Banka, također, vodi određene račune stranih valuta u smislu sporazuma između Vlade Bosne i Hercegovine i stranih vlada i finansijskih organizacija, kao i devizne račune državnih institucija i agencija za koje Banka djeluje kao agent. Kako ovi računi nisu niti aktiva niti pasiva CBBiH, oni nisu uključeni u gorenavedeni bilans stanja. Ukupni iznos sredstava koja se drže na ovim računima je bio 484.528 hiljada KM.

Dalji upiti koji se tiču Mjesečnog bilansa stanja mogu se uputiti Odjelenju za računovodstvo i finansije u Sarajevu na tel. (33) 27 81 19, fax. (33) 27 82 94. Predstavnici medija mogu se obratiti Službi za odnose s javnošću na tel. (33) 27 81 23, fax. (33) 27 82 96.

Centralna banka Bosne i Hercegovine je neovisna monetarna institucija BiH i nema nikakvih organizacijskih veza sa bilo kojom poslovnom bankom.

Mjesečni bilans stanja (privremeni) od 30. juna/lipnja 2007. godine
(iznosi u hiljadama KM)

AKTIVA		Ukupan iznos	EUR	Ostale valute
1	Devizna aktiva	5.899.163	5.895.016	4.147
1.1	Gotovina	32.839	32.801	38
1.2	Kratkoročni depoziti	5.466.484	5.463.245	3.239
1.3	SDR u MMF-u	276	0	276
1.4	Investicije u vrijednosne papire	398.970	398.970	0
1.5	Dividende	594	0	594
2	Ostala aktiva	56.498		
	UKUPNA AKTIVA (1 + 2)	5.955.661		

PASIVA		Ukupan iznos
3	Monetarna pasiva	5.593.497
3.1	Valuta u opticaju	2.207.565
3.2	Kreditni bilans rezidentnih banaka	3.269.123
3.3	Kreditni bilans ostalih rezidenata	116.809
4	Obaveze prema nerezidentima	969
5	Ostala pasiva	2.949
6	Kapital i rezerve	358.246
	UKUPNA PASIVA (3+4+5+6)	5.955.661

Neto devizna aktiva minus monetarna pasiva (1 - 3 - 4)	304.697
--	---------

mr Ankica Kolobarić
Glavni interni revizor



mr Kemal Kozarić
Guverner

Sarajevo (datum) 23.07.2007.